

Na osnovu člana 29. Zakona o izvršenju budžeta Tuzlanskog kantona za 2012. godinu („Službene novine Tuzlanskog kantona“ broj: 3/12) i Programa raspodjele namjenskih sredstava Ministarstva prostornog uređenja i zaštite okolice za 2012. godinu, a u skladu sa Odlukom o utvrđivanju uvjeta, kriterija i postupaka za raspodjelu namjenskih sredstava iz ekoloških naknada, Ministarstvo prostornog uređenja i zaštite okolice raspisuje:

JAVNI KONKURS *za dodjelu sredstava javnim preduzećima*

1. Predmet javnog konkursa

Predmet javnog konkursa je prikupljanje prijave javnih preduzeća za dodjelu sredstava koji se odnose na:

- saniranje deponija i smanjivanje nastajanja otpada,
- zbrinjavanje svih vrsta otpada i
- unapređivanje i izgradnja infrastrukture za zaštitu okoliša (proširenje područja organiziranog skupljanja otpada).

Neće se uzeti u obzir projekti koji se odnose na izradu studija, elaborata, kao i projekata edukativnog karaktera, te projekti koji su napravljeni radi stvaranja koristi uposlenim ili drugim licima.

2. Korisnici sredstava koji imaju pravo na podnošenje prijave

Pravo učešća na javnom konkursu imaju javna preduzeća koja imaju sjedište, obavljaju djelatnost i realiziraju projekte na području Tuzlanskog kantona.

3. Uvjeti kojima podnositelji prijave moraju udovoljavati

Projekti koji će se uzeti u razmatranje se dostavljaju na posebnom obrascu i treba da sadrže:

1. naziv projekta,
2. oblast zaštite okolice na koju se odnosi projekt,
3. ciljevi projekta (na koji način doprinosi rješavanju problema),
4. detaljni opis projekta (opisati po fazama i po mogućnosti opisati sve projektne aktivnosti i dinamiku realizacije), sa eventualnom potrebnom propratnom dokumentacijom (skice, planovi, crteži, fotografije, CD prezentacije i slično),
5. specifikaciju troškova sa visinom sredstava koje se potražuju od Ministarstva (navesti detaljnu specifikaciju),
6. rok realizacije projekta,
7. sufinansiranje projekta (navesti u procentima ukoliko ima sufinansiranja i dokaz – odluka nadležnog organa preduzeća),
8. usklađenost poslovanja javnog preduzeća sa odredbama Zakona o zaštiti okoliša (dati podatke i dokaze o posjedovanju okolinske dozvole ukoliko je obavezna) i
9. podatke o kontakt osobi vezano za realizaciju projekta (ime i prezime, kontakt adresa, telefon i e-mail).

Neće se uzeti u razmatranje prijave javnih preduzeća:

- koja su dobila finansijsku pomoć od ovog Ministarstva, ako nisu ispunila obavezu pravdanja dodijeljenih sredstava i
- koja ne dostave dokumentaciju za dokazivanje ispunjavanja uvjeta iz člana 4. javnog konkursa i koje ne razrade projekat kako je definirano članom 3. javnog konkursa.

4. Popis dokumenata koje je potrebno priložiti uz prijavu

Podnosioci prijave dužni su dostaviti slijedeću dokumentaciju kojom dokazuju ispunjavanje uvjeta:

1. aktuelni izvod iz sudskog registra društava (bez djelatnosti),
2. uvjerenje o poreskoj registraciji (ID broj),
3. spesimen potpisa iz banke lica odgovornih za finansije,

4. dokaz da nije pod stečajem ili likvidacijom,
5. dokaz da pravno lice nije osuđeno u sudskom postupku za kršenje zakona u smislu njegovog poslovnog ponašanja u razdoblju od pet godina,
6. pozitivno mišljenje općine o kandidovanom projektu i
7. projekat (ovjeren i potpisan od strane podnosioca).

Dokumenti navedeni pod 1., 4. i 5. ne mogu biti stariji od tri mjeseca. Dokumenti se prilažu u originalu ili ovjerenj kopiji.

5. Osnovni kriteriji odabira

Osnovni kriteriji odabira za javna preduzeća su:

- oblast zaštite okolice (do 30 bodova),
- rok realizacije projekta (do 20 bodova),
- sufinansiranje projekta (do 20 bodova) i
- usklađenost poslovanja preduzeća sa odredbama Zakona o zaštiti okoliša (do 30 bodova).

6. Vrednovanje projekta

Prijedlog raspodjele sredstava javnim preduzećima daje komisija imenovana od strane ministra.

7. Opće odredbe

Javna preduzeća imaju pravo na javni poziv prijaviti jedan projekat. Maksimalni iznos koji se javnom preduzeću može odobriti za projekat je 50.000 KM.

Projekti se predaju na adresu:

Tuzlanski kanton
Ministarstvo prostornog uređenja i zaštite okolice
Pisarnica Vlade TK (Slatina br. 2, Tuzla),
(sa naznakom: „ZA JAVNI KONKURS – NE OTVARATI“)

Rok za podnošenje prijave je 8 dana od dana objavljivanja javnog poziva u dnevnim novinama. Javni poziv za dodjelu sredstava javnim preduzećima zajedno sa propisanim obrascem iz tačke 3. javnog konkursa će biti objavljen i na zvaničnoj web stranici Vlade Tuzlanskog kantona www.vladatk.kim.ba.

Neblagovremene i nepotpune prijave neće se uzeti u razmatranje.